



Broj: PD-104/24

Sarajevo, 26. 12. 2024.

PREDSTAVNIČKI DOM
PARLAMENTARNE SKUPŠTINE
BOSNE I HERCEGOVINE
N/R PREDSEDavajućEG

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO:		26-12-2024	
Organizaciona jedinica	Klasifikaciona oznaka	Redni broj	Broj priloga
01-50-1		2708/24	

PREDMET: Poslaničko pitanje u pisanoj formi

U skladu s čl. 170. i 171. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22, 59/2, 87/23 i 50/24) postavljam poslaničko pitanje predsjedavajućoj Vijeća ministara Bosne i Hercegovine i predsjedavajućoj Radnog tima u Bosni i Hercegovini za izradu Plana reformi za provedbu Plana rasta za Zapadni Balkan koje glasi:

1. Iz kojih razloga i na osnovu kojih argumenata članovi Parlamentarne skupštine Bosne i Hercegovine, zastupnici i delegati, ni na koji način nisu uključeni u rad Radnog tima u Bosni i Hercegovini za izradu Plana reformi za provedbu Plana rasta za Zapadni Balkan (u daljnjem tekstu: Radni tim) koji je imenovan Odlukom Vijeća ministara Bosne i Hercegovine broj VM 9/24 od 17. januara 2024. („Službeni glasnik BiH,” broj 8/24), niti su konzultirani, a niti informirani putem nadležnih komisija za europske integracije o izradi i sadržaju tog dokumenta koji je predmet usaglašavanja između političkih stranaka koje čine koaliciju na državnom nivou?
2. Zašto nacrt ili osnovna verzija sadržaja Plana reformi za provedbu Plana rasta za Zapadni Balkan (u daljnjem tekstu: Plan reformi) nije objavljen na web platformi “eKonsultacije” radi javnih konsultacija i uključivanja zainteresirane javnosti, organizacija civilnog društva i građana u kreiranje ovog važnog dokumenta?
3. Zašto nacrt ili osnovna verzija sadržaja Plana reformi nije nigdje javno objavljena niti je dostupna javnosti za pregled i upoznavanje sa sadržajem i reformama koje su planirane tim dokumentom i koje su prioritet za daljnji europski put Bosne i Hercegovine?
4. Molim Vas da mi dostavite nacrt ili osnovnu verziju Plana reformi sa svim dosadašnjim primjedbama, prijedlozima, komentarima i izmjenama koje su usaglašene ili koje se usaglašavaju na sastanicima Radnog tima i/ili političkih stranaka koje čine koaliciju na državnom nivou.

Apsurdna je i neprihvatljiva netransparentnost izrade Plana reformi jer, ni nakon skoro godinu dana od dana imenovanja Radnog tima, nacrt ili osnovna verzija sadržaja tog dokumenta, koji je predmet usaglašavanja između političkih stranaka koje čine koaliciju na državnom nivou, nije nigdje javno objavljen niti je dostupan ni nama zastupnicima ili delegatima Parlamentarne skupštine Bosne i Hercegovine.

Podsjećam Vas da je na osnovu tačke (34) preambule Uredbe Europskog parlamenta i Vijeća o uspostavi Instrumenta za reforme i rast za Zapadni Balkan (u daljnjem tekstu: Uredba) utvrđeno da bi "program reformi" trebalo pripremiti uz blisko savjetovanje s relevantnim sudionicima, uključujući parlamente, lokalna i regionalna predstavnička tijela i tijela vlasti, socijalne partnere i organizacije civilnog društva kako bi njihov doprinos bio vidljiv i u programima reformi, te kako bi se osigurao jasno formuliran okvir za poticanje uključivog i održivog socioekonomskog rasta usklađenog sa zahtjevima za pristupanje Europskoj uniji i temeljnim pitanjima procesa proširenja.


Takoder, članom 14. stav 4. Uredbe određeno je da će u svojoj ocjeni plana reformi Komisija posebno uzeti u obzir i kriterij pod tačkom (j) *odražava li program reformi doprinos relevantnih dionika, uključujući parlamente, lokalna i regionalna predstavnička tijela i vlasti korisnika, socijalne partnere i organizacije civilnog društva.*

Na osnovu navedenih obavezujućih odredbi Uredbe molim Vas da mi u što kraćem roku odgovorite na postavljeno zastupničko pitanje, te da mi dostavite nacrt ili osnovnu verziju Plana reformi na bosanskom jeziku, sa svim dosadašnjim primjedbama, prijedlozima, izmjenama i komentarima članova Radnog tima, kako bih kao član Predstavničkog doma Parlamentarne skupštine bio informiran o dosadašnjem toku izrade i usaglašavanja ovog važnog dokumenta koji je uvjet za Bosnu i Hercegovinu radi primanja finansijske podrške u okviru Instrumenta za reforme i rast za Zapadni Balkan.

S poštovanjem,

POSLANIK
PREDSTAVNIČKOG DOMA

Jasmin Emrić



Dostavljeno:

- 1. Naslovu,
- 2. a/a.